


TEZAUUR LITURGIC

5 MAI

ACATISTUL SF. CUVIOS VARLAAM DE LA SERPUHOV



MOSCOVA, 2000



Акафист

святому преподобному

Варлааму Серпуховскому

Кондак 1

Избранный чудотворче и угодниче Христов, преподобне отче наш Варлааме, верный учениче и друже святителя Алексия, обители Владычицы Богородицы устроителю, скорый недугов душевных же и телесных целителю, приими от нас с любовью приносимое тебе хвалебное пение, и, яко имеяй дерзновение ко Господу, молитвами твоими от всяких бед и скорбей свободы зовущих: Радуйся, преподобне Варлааме, земли Серпуховския преславный чудотворче.

Икос 1

Ангел земный и человека небесный явися, преподобне Варлааме, егда удалился еси в место пустынно и тамо, иноческий чин прияв, в молитвах, посте и богомыслии пребывал еси. Мы же таковым подвигом твоим дивящися и

благоговейне чтуще тя воспеваем сице: Радуйся, Христа ради суету мира сего оставивый; радуйся, жестокое пустынное житие проходивый. Радуйся, в ангельский чин облеченный; радуйся, в монашестве делании умудренный. Радуйся, безмолвия истинный любителю; радуйся, иноческих обетов исполнителю. Радуйся, в ризу смирения одеянный; радуйся, святителем Алексием в келейники избранный. Радуйся, святителю великому и чудотворцу с любовью послуживый; радуйся, совершенное послушание архипастырю своему явивый. Радуйся, угодниче Божий, в чудесех просиявый; радуйся, обитель Владычицы Богородицы устроивый. Радуйся, преподобне Варлааме, земли Серпуховския преславный чудотворче.

Кондак 2

Виде святитель Алексий свет велий в келии своей и глас слыша от иконы Пресвятыя Богородицы глаголяй: «Алексие, подобает тебе монастырь поставити имени Моему, купно же и себе в память». Егда же нача молитися святитель преклонь колена, паки глагол бысть, повелеваяй обитель устроить в пределе града Серпухова.

Темже мы, чудо сие прославляюще, воспоим Богу песнь: Аллилуиа.

Икос 2

Разумом свыше просвещен быв и повинуюся воли Божией и Владычицы Богородицы, уготова святитель Алексей вся потребная монастырю и благослови келейника своего преподобного Варлаама, да усмотрит место для обители. Мы же, отче Варлааме, о таком твоём избрании дивимся и сие тебе поем: Радуйся, узкими вратами за Господом последовавый; радуйся, богатства мира сего и славу его возненавидевый. Радуйся, обители иноческих основателю; радуйся, монахов добрый наставниче. Радуйся, святителя Алексея друже и собеседниче; радуйся, преподобного Сергия славный сподвижниче. Радуйся, в келии великого святителя земли Русския воспитанный; радуйся, святительским к тебе дружеством не возносивыйся. Радуйся, подвижниче, благодатию Божиею осененный; радуйся, от людей российских с любовью прославляемый. Радуйся, Церкви Русския украшение; радуйся, душ наших радование. Радуйся, преподобне

Варлааме, земли Серпуховския преславный чудотворче.

Кондак 3

Сила Вышняго благодатию осени тя, преподобне Варлааме, егда обрет место красно в земли Серпуховстей, услышал еси тамо звон велик, гремения сосудов, и помыслив, яко ту подобает монастырь поставити, воротился еси возвестити о сем Алексию святителю, воспевая радостно Богу: Аллилуиа.

Икос 3

Имый в памяти бывшее тебе знамение, блаженне, приял еси послушание от святителя Алексия еже быти строителем монастыря, обаче смотрением Божиим пал еси, яко мертв. Видев же сие, возопи святитель ко образу Владычицы Богородицы и по слову Ея взят за руку тя, преподобне Варлааме, и абие востал еси, плача вельми о бывшем тебе видении. Сего ради любовию подвизаеми, воспеваем тебе таковая: Радуйся, дивнаго и страшнаго видения удостоенный; радуйся, прежде отшествия своего тайну видения сего никомуже открывый. Радуйся, славным явлением Пресвятыя

Богородицы обрадованный; радуйся, дом Владычицы Богородицы воздвигнувший. Радуйся, покровом Царицы Небесная осененный; радуйся, в труде на благо обители от Нея благословенный. Радуйся, землю Серпуховскую вскоре достигнувший; радуйся, вертоград духовный zde насадивый. Радуйся, на месте сем в подвиге иночества поживый; радуйся, оно молитвами своими освятивый. Радуйся, добрый делателю винограда Христова; радуйся, благодати Духа Святаго сосуде избранный. Радуйся, преподобне Варлааме, земли Серпуховския преславный чудотворче.

Кондак 4

Бурею помыслов смущаемъ был еси, преподобне, о недостойнстве своем, размышляя о немощи своей исполнити благословение: како буду воздвизати обитель имени Владычицы Небесной, купно же и памяти святителя. Темже укрепляемъ и ободряемъ дивным видением, уразумел еси, яко Сама Пречистая Дева благословляет тя устроить храм и обитель во имя Введения Ея во храм, Ейже со умилением взывал еси, отче, поя Богу: Аллилуиа.

Икос 4

Слышав святитель Алексей, яко преподобный Варлаам обрете удобное место для обители от Бога указанное, сам прииде во град Серпухов и на том же месте в нощи глас услыша, повелеваяй zde монастырь поставити и абие повинуюся сему, повеле церковь заложити, строителем тя, преподобне Варлааме, поставляя. Таковому содружеству твоему с великим угодником Божиим Алексием дивимся и сиче тебе глаголем: Радуйся, любовь и преданность совершенную святителю Алексию явивый; радуйся, строителем обители Владычней им поставленный. Радуйся, сотаинник ему верен бывый; радуйся, содружество с ним до кончины своя сохранивый. Радуйся благословение святителя Алексия исполнивый; радуйся, град Серпухов обителию дивною украсивый. Радуйся, церковь чудную во имя Введения во храм Пресвятыя Девы в ней устроивый; радуйся, в церкви сей со ученики твоими радостно Бога воспевавый. Радуйся, земли Серпуховския благодатный крине; Радуйся, российских иноков славо. Радуйся, кротости и смирения исполненный; радуйся, отче милостивый и

благодатный. Радуйся, преподобне Варлааме, земли Серпуховския преславный чудотворче.

Кондак 5

Боготечная звезда явился еси во граде Серпухове, отче Варлааме, путь заповедей Господних показуя всем хотящим иноческое житие проводитьи и добре управляя еси тринадцать лет обителию Владычней. Темже убо и нас, во тьме страстей пребывающих, сиянием добродетелей твоих озари, да возопиим о тебе с благодарением Богу: Аллилуиа.

Икос 5

Видеша тя братия обители Владычния дивнаго строителя и попечителя о спасении Богом врученнаго тебе стада, церкви бо и келии созидал еси, иконами их украшая, и вся в монастыре яже на потребу добре устроил еси. Таковым неусыпным трудом твоим дивящися восхваляем тя сице: Радуйся, обители Владычния богомудрый устроителю; радуйся, храмов ея благоукрасителю. Радуйся уставы отеческия во обители утвердивый; радуйся, в иночестем житии многих братьий укрепивый. Радуйся,

подвизающихся в ней славословити Господа и Матерь Божию научивый; радуйся, добре стадо тобою собранное на спасение наставивый. Радуйся, житием твоим образ иноком явивый; радуйся к Небесному Отечеству их руководивый. Радуйся, монашествующих искусный водителю; радуйся, обители твоя присный пред Богом предстателю. Радуйся, крест свой терпеливо носивый; радуйся, образ совершенства духовного в себе явивый. Радуйся, преподобне Варлааме, земли Серпуховския преславный чудотворче.

Кондак 6

Проповедник добродетельного жития и благодатных даров твоих явися святитель Алексей, егоже ослепнув призвал еси, преподобне. Ведый же близкую кончину свою рекл еси святителю: монастырь ты сам соградил еси и церкви освятил еси, и мене погреби своима рукама. Алексей же святитель скоро прииде ко граду Серпухову во обитель Владычнюю и исцели тя, отче Варлааме, от слепоты, воспевая Богу чудотворящему: Аллилуа.

Икос 6

Возсия свет велий в келии твоей, преподобне, егда беседовал еси со святителем Алексием. Ты же, отче Варлааме, призвав слепаго инока Гедеона, и положив на главу его руку свою рекл еси: со мною ты ослеп днешь и прозри, аз же днешь отхожу к Богу, ты же пожив три недели, преставишися. Мы же, ведуще слов твоих исполнение, с любовью воспеваем тя тако: Радуйся, богоносным Алексием от слепоты исцеленный; радуйся, дух его во иноцех обители насаждавый. Радуйся, откровения о скорой кончине своей сподобивыйся; радуйся, дух твой всецело в руке Господа предавый. Радуйся, на земли Светом небесным озаренный; радуйся, источнике чудес благодарованный. Радуйся, иноку обители Гедеону зрение чудесно возвративый; радуйся, блаженную кончину его предвозвестивый. Радуйся, к Богу дерзновение велие стяжавый; радуйся, Господу своему до смерти служивый. Радуйся, Матери Божией избранниче преизрядный; радуйся, молитвенниче к Ней усердный. Радуйся, преподобне Варлааме, земли Серпуховския преславный чудотворче.

Кондак 7

Хотящу тебе и по кончине страж быти обители Владычния, заповедал еси, да будет погребено тело твое в паперти храма, егоже создал еси по велению Пресвятыя Девы. Вся же братия со святителем Алексием провождаху тя и положиша тело твое тамо, идеже и по ныне под спудом пребывает, творяще надгробную песнь: Аллилуиа.

Икос 7

Новаго чудотворца показа тя Господь в земли Серпуховстей, Варлааме преподобне, исцеления бо недужным источаеши и всяку болезнь в людех врачуеши, иже с верою и любовью ко гробу твоему притекают, молитвенно призывающе имя твое святое. Темже покланяемся месту покоя твоего и славословим тя сице: Радуйся, праведно и богоугодно течение земное совершивый; радуйся, веру, надежду и любовь до конца сохранивый. Радуйся, Матере Божия служителю усердный; радуйся, во обители Ея упокоивыйся. Радуйся, святителем Алексием погребенный; радуйся, к лику преподобных сопричтенный. Радуйся, от земныя обители во обители небесныя преселивыйся;

радуйся, в радость Господа твоего вшедый. Радуйся, венец нетленный от Господа получивый; радуйся, от Него благодать исцелений приявый. Радуйся, гроб твой яко сосуд благодати нам оставивый; радуйся, яко и по смерти с нами пребываеши. Радуйся, преподобне Варлааме, земли Серпуховския преславный чудотворче.

Кондак 8

Странное и преславное чудо вспоминая, благослови святитель Московский Алексий икону написати по образу видения твоего, отче Варлааме, на нейже Пресвятая Дева с рождшими Ю изображени бысте и Захария пророк, иже Препоблагословенную во Свята Святых вводит. Образ сей, во обители поставленный, многими чудесы прославися, к нему же с любовию притекающе вопием Богу: Аллилуиа.

Икос 8

Всем сердцем и любовию послужил еси, преподобне отче Варлааме, созданию обители Владычня, и по кончине твоей о нуждах ея прилежал еси, великий наш предстателю. И

ныне всех приходящих к мощем твоим не оставляеши: болезни исцеляя, печали утоляя, от бед избавляя. Сего ради благодарни суще взываем ти сице: Радуйся, прославлением святых мощей твоих обитель Владычнюю возвеселивый; радуйся, благодать Божию в ней умноживый. Радуйся, многая чудеса и знамения от гроба твоего явивый; радуйся, молящимся пред ним скорую помощь подавая. Радуйся, яко демони гроба твоего трепещут; радуйся, яко бесныя во обители твоей исцеляются. Радуйся, болящих душою и телом безмездный целителю; радуйся, помраченных умом просветителю. Радуйся, скорби и печали в радость претворяя; радуйся, Судию Праведного за грешныя люди умоляя. Радуйся, всех скорбящих и плачущих утешителю; радуйся, Божественныя любве вместилище. Радуйся, преподобне Варлааме, земли Серпуховския преславный чудотворче.

Кондак 9

Вси людие страны Серпуховския радовахуся, егда на месте сем, идеже потрудился еси, преподобне, аще и преста zde иноческое житие, благословенный Государь Александр Первый обитель девичью повеле создати. Сего ради

славят тя подвижающимися в ней сестры, с нимиже и мы благодарим прославльшаго тя Господа и вопием Ему: Аллилуиа.

Икос 9

Ветия многовещанныя недоумеют достойно восхвалити и прославити дела, яже творил еси на земли во плоти сый, но и по преставлении твоём многая и преславная чудеса творити не престаеши. Честный бо гроб твой подобен Силоаму, идеже хромии, недужнии, расслаблении и одержимии духами злобы здравие улучают. Мы же имуще во обители Владычней таковое безценное сокровище, воспеваем сице: Радуйся, о инокинях обители Владычния Богу предстояй; радуйся, о вечном спасении к подвижающимся в ней взылавый. Радуйся, духовная чада твоя у гроба твоего собираяй; радуйся, от всяких скорбей и зол их ограждай. Радуйся, слепым прозрение, глухим слышание подаваяй; Радуйся, близ смерти стоящих к жизни возвращаяй. Радуйся, расслабленных благодатное укрепление; радуйся, бедствующих благонадежное избавление. Радуйся, колеблющихся в вере твердое ограждение; радуйся, погибающих надеждо и

исправление. Радуйся, телес наших врачу и хранителю; радуйся, душ наших к Царствию Небесному возведение. Радуйся, преподобне Варлааме, земли Серпуховския преславный чудотворче.

Кондак 10

Спасти хотяй некоего крестьянина недугом пьянства одержимаго, трикратно явился ему преподобный Варлаам в видении соннем и повеле молебн послужити пред иконою Богоматере во обители Владычней. Той же, повеление исполнив, исцелися от недуга своего, из глубины сердца взывая благодарственне Богу: Аллилуиа.

Икос 10

Стена еси и заступление всем страждущим людем обитель твоя, преподобне, идеже чудная икона Богоматере, Неупиваемою Чашею именуемая, исцеление дарует отчаявшимся и погибающим, наипаче же болезнующим пьянством. Темже и нам с верою ко святым мощам твоим приходящим, буди предстатель, умоли Пречистую Владычицу исцелити нас от страстей греховных, да вопием тебе с любовию

таковая: Радуйся, Заступницы Усердныя благоговейный почитателю; радуйся, к Богородице молитвенниче наш неусыпный. Радуйся, яко тобою дивная икона Богоматере прославися; радуйся, яко от нея мнози исцеление от пьянства приимаху. Радуйся, яко от всех градов и весей народи во обитель твою притекают; радуйся, яко того ради по всей Велицей России возвещают имя твое. Радуйся, от недуга пьянства страждущих избавляяй; радуйся, одержимых страстями от рова погибели спасаая. Радуйся, к подвигу воздержания нас призываяй; радуйся, отчаянным надежду и помощь подаваяй. Радуйся, спасению многих душ человеческих послуживый; радуйся, трезвеннаго жития наставниче. Радуйся, преподобне Варлааме, земли Серпуховския преславный чудотворче.

Кондак 11

Пение молебное от лет древних даже и до ныне совершается у гроба твоего, преподобне, чудеса же многая от него источаются обильно. Темже славим тя, чудотворца милостиваго и с любовью покланяемся мощем твоим, просяще

предстательства твоего пред Господем, Емуже благодарственно взываем: Аллилуиа.

Икос 11

Свет благодати Божия от цельбоносных мощей твоих явился не точию во граде Серпухове, но всю богоспасаемую Россию освети многими чудесы. Обаче во дни гонений на веру Христову обитель твоя опусте, сестры же ея терпением посрамиша враги Церкви Христовы и венцы мученическими украсишася. Егда же безбожнии восхотеша мощи твоя осквернити пламень из земли попали я. Сего ради с верою к заступлению твоему прибегаем и тепле вопием ти: Радуйся, светильниче Света небеснаго; радуйся, пламене, пожигаяй злочестие. Радуйся, света Христова носителю; радуйся, яко и нас благодатным светом просвещаеши. Радуйся, града Серпухова верный защитниче; радуйся, обители Владычния освящение. Радуйся, сестер обители в стоянии за веру православную укрепивый; радуйся, мужеству в испытаниях и всех нас научаяй. Радуйся, безбожных силою Божию посрамивый; радуйся, гордыню их в студ и безчестие обративый. Радуйся, звездо пресветлая, над землею

Серпуховскою возсиявшая; радуйся, пред Престолом Божиим лампадо неугасимая. Радуйся, преподобне Варлааме, земли Серпуховския преславный чудотворче.

Кондак 12

Благодать неистоцимую яви нам Господь на гробе твоем, угодниче Божий Варлааме: недужных болезни врачевати, демоны прогоняти и страсти исцеляти. Темже молим тя с любовию, подаждь благодатную тишину отчизне нашей, умоли Господа даровати нам грехов оставление и помогай всем любящим тя, а наипаче zde подвижающимся, до конца жизни воспевати Богу песнь: Аллилуиа.

Икос 12

Поюще многая и славная чудеса твоя, прославляем возвеличившаго тя Господа и благодарение приносим ти, отче Варлааме, обитель бо Владычня, во времена лихолетия разоренная, паки возставися, силою же лучшею обновися, в нюже инокини и паломники благочестивии текуще, яко отца и первоначальника обители восхваляют тя сице: Радуйся, яко обитель твоя, от безбожных

разоренная, возставися; радуйся, яко паки тем светильник благочестия Церкви Русской даровася. Радуйся, яко храмы и здания ея молитвами твоими благолепно обновляются; радуйся, яко тобою благочестие в ней укрепляется. Радуйся, о обители твоей и сестрах ея неусыпный попечителю; радуйся, приходящих в ню благий предстателю. Радуйся, подвизающимся в ней инокиням спасения вечный ходатаю; радуйся, почитающих святую память твою небесный покровителю. Радуйся, от всея земли Российския во обитель людей православных призываяй; радуйся, благословение Божие на zde труждающихся низводяй. Радуйся, Богом дарованный нам заступниче; радуйся, молитвенниче крепкий за Русь Православную. Радуйся, преподобне Варлааме, земли Серпуховския преславный чудотворче.

Кондак 13

О великий угодниче Божий преподобне отче Варлааме, прими сие малое моление наше, в похвалу тебе приносимое, и со Пресвятою Владычицею Богородицею и всеми святыми земли нашея умоли Господа даровати мир и

благоустроение Церкви Православной и стране
Российской, да сподобимся с тобою в Царствии
Небесном воспевати Спасителю нашему
благодарную песнь: Аллилуиа.

Этот кондак читается трижды, затем икос 1-
й и кондак 1-й

Молитва

О преподобне и Богоносне отче наш
Варлааме, обители Пресвятыя Владычице
Богородицы устройтелю, земли Серпуховския
украшение, милостивый и теплый о нас к Богу
ходатаю и чудотворче преславный! Приклони
ухо твое на моления наша, буди нам благих
податель и в житии сем многоскорбнем
утешитель и наставник. Научи ны, суетными
попечениями обуреваемыя, первее Царствия
Небесного искати, и в послушании и смирении
сердечном волю Божию исполняти. Яко руце, на
помощь нам немощным простираемыя, да будут
твоя святыя к Богу за ны молитвы. Подаждь же
исцеления душам и телесем нашим, да в радости
духовней благодарственныя и хвалебныя пения
не престанем возсылати, и тако твоим
заступлением храними, достигнем в тихое и
безмятежное пристанище, идеже ты со Ангелы и

всеми святыми присно славиши Пречестное и Великолепое Имя Отца и Сына и Святаго Духа, аминь.

